

## Strategia Rozwoju Gminy Radzionków na lata 2014 – 2025

26 kwietnia łńskiego roku radni ze Cidrów przikozali coby birgemajster wzion sie za robota i łpracowoł "Strategia Rozwoju Gminy Radzionków na lata 2014 – 2025". Skuli tego podpisoł łon umowa z rectorami ze Uniwersytetu Ekonomicznego we Katowicach – dr Małgorzatą Czornik i dr. Adamem Drobnikiem, forzy som w tym fachmanami.

Po prowadzie trza pedzieć, że fest im w tym pomogli miyszkańcy Radzionkowa, kerzy przilazili na roztomajte spotkania, warsztaty i konsultacje. Beamtry rozdowali im tyż ankiety i wypytywali ło to, jak mo być we Cidrach na bezrok i jesce dalij.

Rechtory wszystko to porachowali, łpracowali i napisali fest mondry i fest ruby dokument, kery sie nazywo „Strategia rozwoju Miasta Radzionków na lata 2014 – 2025”. Wycytać w nij idzie:

- Jak jest dzisioj
- Co momy fajnego a co niy
- Co musimy wyłonacyć żeby Cidry sie durch rozwijały
- Co momy robić by być we zgodzie ze achtami Unie Europejskij, Polski i Śląska
- Jak to doporządku kontrolować

Nojważniyszo myśl strategii idzie pedzieć jednym zdaniym:

**W Cidrach mo sie dobrze miyszkać, a wszyscy majom wiedzieć, że jak chcom lotworzyć swój geszeft to ino u nos, skuli tego, że ludzie tu som robotni, fest przywiązani do tradycji ale wyuceni i spece łod modernych szpecjalizacyj.**

Dalij stoi napisane co i jak momy robić. I tak:

### **I. Piyrwszo nejważniyszo rzecz: Inteligentno gospodarka.**

Jak mo być?

1. Fyrmie i geszefty z Radzionkowa musom sie rozwijać a niy ino robić jak to piyrwyj było.
2. Ludzie musom sie wartko i durch ucyć tak coby poradzili robic przy komputerach i inkszych automatach.
3. Niy śmiys jechać dugo do roboty.

Jak to zrobić?

Ad. 1

- 1) Trza namowiać biznesmenów coby łotwierali u nos nowoczesne firmy;
- 2) Trza łorganizować spotkania z biznesmenami;

- 3) Trza promować bauplace na kerych idzie wybudować nowe firmy;
- 4) Jedyn beamter z prezydium musi sztajgnonć i łostać doradcom radzionkowskich biznesmenów.

Ad.2

- 1) Trza ucyc modzioków we szkołach jak założyć własny geszeft;
- 2) Trza szkolorzom umożliwić studiowanie za granicom.

Ad. 3

- 1) Trza tak wynokwić coby cugiem szło pryndko zajechać do Katowic;
- 2) Trza dogodać sie ze Bytomiem, Piekarami, Świerklańcem i Tarnowskimi Górami i zu zamen do kupy remontować drogi coby wartko i bez ształów rajzować autem do roboty;
- 3) Trza wybudować ścieżki coby szło zajechać do roboty na kole.

## **II. Drugo nojważniyszcz rzecz: Przyjazno przestrzeń miejsko.**

Jak mo być?

1. W Cidrach mo być kupa miejsc ftorych niy ma gańby pokozać gorolom.
2. Trza mieć w zocy prziroda.

Jak to zrobić?

Ad. 1

- 1) Tam kaj za Wilusia boł dwór Donersmarcków, a za komuny PGR, trza wybudować rynek;
- 2) Przy drogach i tretuarach trza posadzić łozdobne krzoki i rabatki;
- 3) Trza wyremontować familoki na Hugonie;
- 4) Trza na plantach we Rojcy wybudować szpilplace;
- 5) Dło bezpicyczństwo trza zamontować monitoring.

Ad. 2

- 1) Trza poprowić luft i dować pozór coby żodyn niy smyndziół;
- 2) Trza wspiyrać rozwój Śląskiego Ogrodu Botanicznego;
- 3) Trza dować pijondze na ekologiczno edukacjo szkolorzy;
- 4) Trza dbać ło gadzina na Księżej Górze.

## **III. Trzecio nojważniyszcz rzecz: Wyróżniające miejsce zamieszkanie**

Jak mo być?

1. Śląskie wartości muszom być przestrzegane bezmaś jak przikazania łod Pon Buczka.
2. Tak jak dziś, koždy mo wiedzieć czym sie charakteryzujom Cidry i Cidroki.
3. Koždy musi mieć dostęp do usług publicznych.

Jak to zrobić?

Ad.1

- 1) Trza łorganizować festyny na ftorych idzie sie poasić radzionkowskimi tradycjami;
- 2) Trza wspiyrać zespół "Mały Śląsk";

- 3) Trza pokazywać i promować tradycyjnych rzemieślników, np. masarzy i piekarzy;
- 4) Trza realizować program „Identyfikacja kulturowa CIDRY - RESZTA ŚWIATA”;
- 5) Trza przyciągać turystów do Radzionkowa i pokazywać im Muzeum Chleba, Ogród Botaniczny i inksze budowle wpisane na śląski szlak zabytków;
- 6) Trza jak piyrwyj robić wino ze jabłonek czyli Cidra;
- 7) Trza dbać ło muzeum kere powstanie na starym banhofie (Centrum Dokumentacji Deportacji Górnoślązaków do ZSRR).

Ad. 3

- 1) Trza remontować miyszkania i budować nowe - socjalne coby przekludzać do nich tych kerym w gerychcie dali eksmisjo;
- 2) Trza pomagać organizacjom pozarządowym i inkszym ferajnom ftore łoorganizujom imprezy kulturalne;
- 3) Trza unowocześniać wyposażenie we ło obiektach kulturalnych;
- 4) Trza przijonć do roboty we Ośrodku Zdrowia dobrych dochtorów i flyjgery;
- 5) Trza utworzyć altes heim i hospicjum;
- 6) Trza łoorganizować szpile i inksze zawody do szportowców;
- 7) Trza wybudować stadion do fusbalu, zakryty basen i hala do szpilania w neca na piosku;
- 8) Trza pomagać radzionkowskim familijom, nojprzód tym kaj jest dużo bajtli;
- 9) Trza tak robić, coby niy było u nos elwrów a jak jus sie jakis trefi coby dostał pomoc i robota;
- 10) Trza remonotować guliki i wybudować przepompownia ścieków;
- 11) Trza remontować i budować drogi. Niy ino gonki, ale dokończyć II i III etap obwodnicy;
- 12) Trza poprowić dojazd na Górka.

Coby ta strategio niy ło stała yno na papiórze trza jom robić z gowom, nojprzód się wszystko wyforsztelować, potym znolyźć na to pijondze (a ceskich to niy kosztuje) a na koniec poszukać kogoś fto sie za to chyci. Jak mu sie to udo, to Radzionków bydzie nojfajniejszy na świecie. Na końcu opracowanio "Strategia..." opisano metoda jak poznać czy wszystko idzie do porządku.